


或語集

半部豪二刻

PL  
2705  
A4A6  
1689  
V.3





或謔集

辛未冬日書為

園文先生 名曰鄭簫



或語序

近來海內爲古文者多然自有明數大家後求  
合古人法度者亦不易得昔交西川李研齋見  
其才氣雄猛議論慷慨能由唐宋之津梁以上  
窺史漢之堂奧又見寧都魏叔子文心圓潔詞  
章典雅大似曾南豐二公可稱能手近交山東  
張君杞園堪與二公鼎足矣杞園名家世胄讀  
書懷古言滿天下銓衡方有清華之選而杞園  
屢徵未起嘗遊吳越閒購書訪友人爭與之交



余向誦其半部藁已爲傾倒更讀其或語集學益淡法益嚴氣益靜論理正大而精純敘事簡核而典要殆遡六經而有據矣至其名集或語杞園自云吾方用坤之括囊而反取同人之或語蓋其意在同人之九五乎九變爲六則貞悔皆離離體剛明志不相下故有出處語默之異然剛能斷明能照殊塗一致故又有斷金蘭臭之同君子曰於此可以悟爲文之道矣爲文貴變同乎唐宋者離史漢遠矣及同乎史漢又離



唐宋遠矣合唐宋史漢而進之以本六經而明  
心性之學無所云離竝無所云同矣唐荆川晚  
悟文章不過開闔兩字開者離也闔者同也人  
以爲荆川止言章法變化之奇而不知其精義  
入神蓋有當於大易之旨者也且或語者非人  
語我我自語也或者無定之謂爲文之道理積  
於中言宣於口當如夜潮之生春鳥之鳴不知  
其然而然若孟子所謂予不得已者而後爲文  
之至也杞園其有取於此乎杞園徵余序余不



敢辭敬引其首如此康熙癸酉秋月年家弟商  
丘宋犖拜撰



序

文章之氣運大槩百年一變上古如書之典奧  
詩之華藻體備三代各有不同其所同者歸於  
軌則之不易而已後周室東遷孔子修春秋以  
明道丘明爲傳視詩書加詳又一降爲戰國之  
文于是文質相半迨漢室初起高祖惠帝世其  
文猶沿戰國之舊至孝景孝武孝宣以來董賈  
司馬氏起而倡之然後文章炳耀輝煌醇而不  
醜在春秋戰國之間故西京之文卓然千古及



一變爲東漢再變爲魏三變爲晉爲宋爲元魏  
南北朝之文真氣蕩盡唐元和大曆間韓昌黎  
柳柳州李習之皇甫持正起而振之號稱古文  
於是埽去六朝浮豔趨西京之樸茂後宋元作  
者相沿至今故夫西京之不能不爲東京魏晉  
六朝之文亦如六經之不能不爲左傳戰國之  
文時使之然也作者立法垂後必不容舍古雅  
趨卑近以滑於時然因文論世如齊梁亦何可  
少哉人必見之者淡而後發之者大也余持此



論久矣而不敢以告人今年遇杞園張先生與  
之論文及此先生亦以爲然後數日出所爲或  
語示余索爲序先生有半部稟傳世已久或語  
者邇年作也學問日深于文章升降之道察之  
旣熟知之旣精不徒爭於語言之末悠然以往  
所謂同於古人者軌則之不可易而已因舉余  
之證於先生者爲序以遺之余又聞古之人人  
品奇故其文奇先生別業在杞子故城背汶水  
衿濰水日日以雞黍邀田夫野老相盤桓數十



年遍交天下名士偶相思所及不憚千里命駕  
至則促膝談文不知有塵世中事皆非今人所  
及今并記於此以見先生文之所以奇者由其  
人之奇而非襲取乎外者也襲平金德純序



序

明嘉靖間濟南李于鱗與太倉王元美相應和  
矯首怒步目空作者雖其學不無割剝摹擬之  
病要之讀書好古不可謂非中原文獻之所屬  
也安丘張杞園先生以名家世胄蕭然物外身  
任斯文絕續之統著書學道屏卻世勢其所刻  
文集有曰半部有曰或語余受而讀之大略色  
古氣蒼意高筆健波瀾起伏往往有一唱三歎  
之聲直欲起荆川震川相與頡頏於百五十年



之上又非于鱗輩割剝摹擬之作所敢望其項背也昔司馬遷縱覽天下名山大川故其文疎宕有奇氣先生家世青州所居爲東樓公遺壤聚書萬卷知人論世而性好游覽足蹤遍天下於燕眺黃金之故墟於吳弔吳宮之花草於金陵白下歎江左風流文物之盛無復在者以至西湖明月錢塘怒潮廣陵隋苑之遺淮水王孫之蹟所至低徊憑弔感慨悲歌每歲必一過其地而先生之意氣豪矣其游日益久其學日益



精其文亦日益進吾師王阮亭先生方今之歐陽子也嘗序先生半部橐推許甚至余無以益之所謂游夏不能贊一辭者也今而後一推一輓風流可挹中原文獻之傳不慮其無所托矣甬江徐文駒序







或語序

吾同年友張子杞園旣刻其半部橐問世長安  
士大夫爭傳誦之復以其近橐續刻而屬序於  
余憶乙巳歲遇杞園於青州道上維時年方少  
新以詩名於時迄今已三十年於古爲一世矣  
當其披藏書輯家乘片語隻字非鎔鑄經史不  
肯用每一文必棲神寂寞經數日乃成其淹雅  
澹逸絕去痕迹可謂日新者乎迨成熟而肆之  
如清泉之鳴峽輕風之拂溜不自知其起止也



豈求工於字句逐流而不窮其源者邪杞園好  
結客北走燕趙南泛江淮一時操觚之士引領  
願交紅橋長干閭門西陵之側閒歲必一游游  
則畫舫蘭橈勝友雲集投縞贈紵此唱彼和蓋  
其平生以友朋爲性命故所爲文多出於郵筒  
贈答之餘也其言曰文章雖載道之器大抵皆  
緣朋友而作書牘旣以通往來傳誌亦以紀行  
履揚厲盛美贊頌聿興表微闡幽碑誄斯作卽  
別有寄託亦可指數矣因取易同人之辭而名



之以或語詩曰風雨如晦雞鳴不已古君子交友之道如是其可懷也清風穆如之贈詎寡聞眇見者所得而幾歟余家距牟婁僅百里與杞園往還最熟自余宦游京師不與共晨夕者十五年壬申冬東歸得是集讀之然後知良朋相遇不獨山川聚散爲可感而學問相長白首如新爲不虛負焉耳至其文品之雋潔澹而彌旨復而彌淡眉山所謂絢爛之極歸於平淡者乎世有欲窺其涯涘者於此集求之過半矣康熙



三十二年上巳日東武年同學第李澄中謹序



或語題辭

康熙辛未杞園先生霜天尋我同舉匏尊酒半  
出或語集相示三熏三沐擊節快讀體會厥旨  
入史出經情文根本真堪風世談言之妙所謂  
源流至論得古今神髓而信手縱筆發洩奧祕  
無怪一時高流皆尊慕之至也因握筆紀略固  
不足以盡先生然言外深意正在言之中耳黃  
海程邃

今日論文者以掇拾爲該洽以支離爲古奧以



纖弱爲曲折以汎濫爲浩瀚惟杞園意深義精  
才雄氣厚怪偉伏平易之中趣味在言語之外  
欲于虞山堯峯閒更展一席地非凡材也半山  
云看似尋常最奇崛成如容易卻艱辛似爲杞  
園言之矣建業余懷

讀杞園先生半部橐如見大庭禮樂聲容儀器  
備極其盛今讀或語集又如懷珍握璧袞出其  
奇總由先生生平重氣詒喜游歷家在安丘而  
江淮吳越之閒歲常一至至必訪畸人購異書



以返其得於友朋山水者固多亦其才性有大過人者也揚州汪耀麟

杞園以如江如海之才不難一瀉千里而迺過自矜重每成一文必數易橐始肯出以示人觀其所以名集者前曰半部未嘗以全自居也後曰或語或爲未定之辭蓋言可以語可以無語也皆有不敢任心縱筆放言極論之意以視世之梔言蠟貌空然亾有而荒唐俶詭之談溢囊盈帙者果孰爲得失邪豐南吳綺

安丘古多義風如漢之周穉都孫賓碩皆好讀書喜交游著名節者也今杞園張君三十年前曾與余定交于文選樓王西樵先生寓中西樵先生數稱杞園精古文詞又英發豪邁歷名山川卽盡交其地才俊康熙癸酉秋復相值金陵讀其半部彙及或語集并汪洋渟滫蒼堅峭拔如唐宋大家然後知杞園所養愈深而文章亦與年俱進也使起西樵先生于此日有不拂几稱善者乎因太息而識其末江都宗元鼎



予與張子別於京師八年矣并州冷署追念舊  
遊有今昔之感癸酉中秋前一日張子不遠二  
千里慰予于苦次相對欷歔者久之已手近稿  
或語集示予且命爲之序嗟夫予何足以知張  
子哉獨念予與張子定交時年方少壯相期勉  
力於詩古文今已三十餘年俱老矣予疊經患  
難奔走四方卽欲作一二有韻之言舒寫胸臆  
亦不可得乃張子之文一刻再刻已傳於世其  
中規矩法度無一字不出之古人絕無近今空

疎輕率之敝金石古文百年來惟虞山錢先生  
爲作者張子不難直襲其席他可知矣向在都  
門予所居秋水軒背郭臨流爲燕山勝地張子  
顧而樂之因爲作記天下遂莫不知有秋水軒  
者今予居雖陋古白下橋也亦略有樹石亭榭  
使張子更爲之記予將附以不朽矣張子其許  
我乎祥符周在浚

每讀吾友陽羨陳檢討世德賦卽知安丘杞園  
張先生家世人龍文虎爲海內傾仰心竊嚮往



久之辛未秋偶來邗上恰遇先生于興教古寺  
見其秉剛而守毅葆醇而蹈道秀出天外不可  
梯接再讀半部藁及或語集恢之彌廣按之彌  
深旣規矩前賢復自關門戶真得漢唐名家之  
神骨所謂巨靈大手也余以薇露自浣日夕捧  
誦但愧文章一道從未揣摩何能窮其涯涘又  
以潦倒貧賤何敢訂交名賢迺先生不棄成傾  
蓋之歡更獲拱璧之賜敬題數語附以千秋慚  
愧深幸矣如皋冒丹書

昔聞魏叔子論文以變字爲主所以叔子之文  
千篇不同無勦襲雷同之患文之所以可傳也  
杞園張先生別三載而文益變今讀或語集或  
寫山水或爲友朋務立意造境筆隨心生當其  
得意疾書時風馳雨驟傍若無人而按之不差  
累黍應是曾子固陳後山一輩人先生行矣他  
日或訪先生于家同跨蹇驢登泰山絕頂觀九  
點齊烟海底日出先生之文又當一變泰州黃  
泰來



陽羨陳檢討工駢體之文余嗜而註之中有述  
祖德賦乃爲杞園張先生作也先生安丘鼎族  
心竊向往乙亥冬客遊金陵遇先生於六朝松  
石下始知卽檢討賦中之人而先生亦向悅余  
之註此賦今乃歡然以相接也因出半部橐及  
或語集曰爲我序之越三日歸安丘矣余抵寓  
讀之草草未測涯涘然竊於稱集之名而有感  
也稿曰半部豈古人半部致太平之意乎抑不  
以得半自足欲恢恢有餘地乎至集名或語毋

亦折衷大易而不輕語與且語默相半出處相  
半猶然半部之意與余閱集中諸作平生性情  
大半在山水友朋閒先生之文因同人而有語  
卽取義於同人之或語或者無定之詞又無盡  
之詞余又烏能語先生之語而贊所語之萬一  
哉仍於稱集之名悟先生爲文之法而卒讀可  
乎先生令子弭君丙寅拔萃貢入太學余小子  
謬附蘭譜思得一見先生歸必有以語之異日  
更述祖德而爲之賦未爲晚也皖江程師恭



昔人有言文章不朽之盛事予以爲必衷於古  
必規於法而後其文可以歷久而弗敝而莫不  
有氣焉以舉之氣之所積有厚薄則其言之所  
發有淺深剽聲竊響以爲文其失也浮鉤棘險  
僻以爲文其失也滯非文之失也其所以運乎  
文者無本也杞園之文秉經酌雅句櫛字比意  
匠經營每一篇必累日月而後成疑其氣不足  
以運之矣而首尾結構起伏開闔一準於古人  
之法而爲之而無散漫結轡之患譬之運舟於

江河舟之中百物具備而揚颿鼓櫂容與于中  
流而若無事焉有所以運是舟者在也豈與夫  
塗飾掇拾以自欺而欺人者比哉予爲文不能  
自檢率意而言麤疎固陋以校杞園則愧傖父  
矣而要於不敢自欺則一也適杞園或語集與  
予紀城文豪同時梓成予書之以識予之服膺  
乎杞園者如此壽光安致遠

世之論文者咸推司馬子長柳子厚獨稱其潔  
予頌人之能文者輒有溢詞唯潔之一言不敢



妄許今觀于張君杞園其庶幾乎或語者特其  
偶梓近作耳篇固不多虛實詳略行止有法而  
咸以古義副之其可傳無疑有非時流所能及  
者則潔之故與杞園嘗自言其文質而可信而  
予謂其中之所蘊有未易盡者蓋予之信杞園  
其又在或默時矣華山王弘撰時年七十四  
牟婁見於春秋名甚古自三代以迄今茲名人  
畸士往往間出如邵宗邵顗管幼安孫賓碩之  
徒非不彪炳史冊而求其全集大都闕如君子

傷焉今

聖天子崇獎文學吾友張子杞園適逢其會嘗以博學宏詞徵遇太夫人憂乃不獲與五十人之數而杞園亦遂韜光斂彩以大肆其力於文章凡可驚可愕洞心駭目之事悉於行墨發之今其全帙具在或如太史公或如韓吏部或如柳柳州以及劉蛻孫樵之屬無不神明逼肖蓋杞園之學不名一家故遇物肖形亦如化工付物千載而後與館閣諸君子金匱石室之文較



長絜大其傳之久近正未可知也而猶托其名  
曰或語以示可有可無之意其寔光恠陸離爲  
天地間不可少之物無智愚皆知之也以是流  
布於泰山北海之間或不致憾於牟婁之無傳  
人如東漢之若滅若沒也哉同里曹貞吉

神交杞園先生者有年其間雖尺素往還已非  
一二而合并之緣終未及遂止案頭手中常置  
先生文如晤對先生耳今年秋過訪余余客之  
見山樓鐙篝酒鎗流連信宿不但得先生之文

且得先生之人先生爲醇乎其醇之人故應爲  
醇乎其醇之文也昔人評龍門文曰潔潔者醇  
之謂也評廬陵文曰敷腴溫潤非醇不能敷腴  
溫潤也見先生者固自知之未見先生者亦當  
於其文想見之濟南朱縉

從來爲古文者非讀破萬卷書而又有才以馳  
騁之有法以渠鑪之則不足以名家今人一知  
半解輒拈筆弄墨自號古文不知明眼人觀之  
正如張思光詣劉澄都自非是耳往聞安丘張



杞園先生善爲古文曾觀一二首不過片鱗意殊未饜近相晤濟上得讀其全集不禁擊節夫乃謂之善古文果非虛聲也先生當於錢虞山後叅一座中州侯朝宗吾浙黃梨洲猶將拍肩而把袖也余幸矣惟有寒山一片石可與共語庾子山庶無虛北行已乎錢塘沈名蓀

君子立言以明道也道統心理之同言不背於道則見者愜于心孟子所謂聖人復起不易吾言者匪文之不易而言之本於道之不可易也

詩與文皆立言明道中事余常舉以論詩而人或河漢其語緣風人既遠作者之意不傳但襲取詞句以爲詩故積習難悟耳杞園先生見道人其文不事雕績惟取曉暢大義而止而波折頓挫自然成章深得聖人辭達之旨喜其與余言有合也因附著數行以互相發明且將以使後來者之知所歸也任丘龐塏

向嘗手杞園先生文便知先生爲當今古文宗工然人有謂先生文絕似壯悔堂者壯悔堂灋



香在廬陵而太作意轉不免描頭畫角之病先生曾有是耶先生固真廬陵耳近復讀或語集廻環往復覺向之所以窺先生者益信不謬卽請以質之先生不且相視而笑耶濟南朱綱

言是



自敘曰張子舊有所著撰曰半部藁者刻於已  
已夏居亾幾何卽悼亾傷逝衰疾相乘如以危  
葉衝風濱于十歿雖僅而得免人理適盡閉門  
漠漠媮視苟息昔之醉夢沈酣于其閒者皆付  
之前塵影事又何有於文字體氣旣復魂魄漸  
收而游往中二三君子閒以文事相役不能自  
閑紙墨遂多因念文章大氏皆緣朋友而作也  
牋記所以散鬱陶傳志亦以闡幽隱序引多品  
藻之言銘箴寓弼違之義褒德顯容則尙頌讚

會悲引泣斯有弔誅行實敷述固假畢牘以告  
哀論說昭列寔設譏評爲是正也卽別有寄託  
亦可指數矣故采周易之辭以冠之然吾方用  
坤☷之揲囊乃反取同人☶之或語心迹屈奇  
覽者得毋笑其憤憤乎康熙三十二七夕續夢  
老人張貞書



或語目錄

序

周易本義引蒙序

馬見素先生掖垣疏草序

慶園倡和詩集序

西城別墅詩集序

楓脂香堂詩集序

學菴詩彙序

安青士賦彙序

張氏闡牘彙存目錄後序

韓醉白五十壽讌序

題辭

樊會公畫卷題辭

程萬斯印冊題辭

錢波齋印冊題辭

記

安丘縣重修西廡記

重建歷下亭記



唐部鎮重修三官廟記

安丘縣三教堂營造記

游廣福寺記

游揚州劉氏園記

游金陵北城記

游西園記

游雲龍山記

杞城別業圖記

題名

琅邪臺題名

韜光菴題名

金山題名

惠泉題名

虎丘題名

雨花臺題名

燕子磯題名

書事

書二公事



書兩節女事

傳

知非子傳

汪蛟門傳

馬孝子傳

馬太孺人劉氏傳

張節婦傳

張烈女傳

墓碑

封奉政大夫刑部四川司員外郎加一級

原戶部廣西司員外郎劉公墓碑

墓表

孟母墓表

墓誌銘

奉直大夫工部屯田司員外郎于公墓誌

銘

李大椿墓誌銘

李孺人王氏墓誌銘



亾妻李孺人壙誌

亾女權厝誌

女蘅埋銘

行狀

亾室李孺人行略

贊

劉止一畫象贊

馬拙修象贊

曹湘鄰象贊

看雲杖藜圖自贊

銘

洮研銘

方竹杖銘

几銘

襍著

談虎

題跋

書延陵寶墨後



周雪客秋雨懷人詩跋

書淳化殘帖後

書應夢舉子記後

先伯父手鈔蘇文跋

書隋刻勝福寺舍利塏下銘後

題周元龍臨晉唐名帖

題王清遠所藏唐韓幹畫馬

敬輿景宣

壯輿景劉

孫男

長輿景和

較

扶輿景淑



或語

半部彙二刻

杞人張貞造

周易本義引蒙序

吾友姚子青厓取周易諸家訓解決擇其最精密者都爲一集命曰周易本義引蒙屬序于余刊墨斯竟走介布書來告成事且謂非子題其簡端無以垂世行遠余甚愧其意而不獲辭也竊聞夾漈鄭氏有云秦人焚經而經存漢儒窮經而經絕蓋言詮釋經義之難也若夫周易通

神明之德。類萬物之情。廣大悉備。孔子晚喜讀之。至絕韋編。是可知其所重矣。嘗考古者三易掌于太卜。自商瞿橋庇馯臂而後。又兩傳爲田何。則漢興言易之始乎。然漢儒言易。分三家。各有師傳。不可易。田何之學。丁寬傳之。魯之孟喜。齊之梁丘賀。再傳之。寔皆原于子夏。受之孔子。此其一也。焦贛起而東郡京房傳其學。殷嘉乘弘姚平任良爲之徒。此其一也。費直之後傳者。爲鄭玄王弼諸人。此其一也。至唐孔穎達著正



義則祖輔學李鼎祚作集解則宗康成陸德明  
爲釋文則又尊君明其後作者鑿軌或主名理  
或專象數各有偏重至宋二程子爲傳可稱揆  
微乃詳於理而略於數亦不能不啟後人之擬  
議紫陽夫子出而合兩先生之學以爲書質理  
驗數貫殊析同其精詣獨得有非漢儒所及知  
者而大易之道始無遺憾青厓爲給諫公孫以  
古直先生爲之父以熙如先生爲之兄濡染其  
風尚浸漬其議論蓋不出家庭唯諾几席丈函

之間淵源授受已迥出儔倫而其爲人視精而  
行端心和而志厚布衣蔬食蕭閒淡止無所誘  
以散越其神無所脅以虧疎其氣韓子之稱李  
翱所謂有道而文者也其治易也卻埽杜門焚  
膏宿火假年窮老以從事由唐至漢溯而通之  
由宋元至有明沿而別之獨取其有合於考亭  
之旨者會粹成書遂使世之爲其學者如見斗  
杓如得指南焉或謂是編有資於場屋帖括者  
爲多其於闡揚性道尚隔一塵不知經義之設



正以剖析前人未發之祕也。歷代以來念六經之蘊深而難知。故取章句。裁以爲題。敷陳詞旨。如一出於聖賢之言。其道之精微變化盡矣。特患傭耳剽目之徒。傳會穿鑿。植釀而叢脞。始偁背於大道耳。何若斯之擺落悠悠。研尋雅故。發皇蕩滌。煥然與本義同風。用以譚理。則洞前燭後。可以窺周孔之闡奧。用以爲文。則根茂實遂。可以挽輓近之頽靡。余雖衰老。猶將執簡以觀其盛。又安見窮經而經不賴之以存也哉。康熙

三十四年歲在旃蒙大淵獻夏四月丁酉牟山

張貞謹序

歷敘易學而以考亭爲儀的人所易曉至帖  
括原以明經講義卽以闡道人所易忽文能  
一一指出始知其真爲持世之書行見戶諷  
人弦寶裝綺藉矣

朱子書



掖垣疏草序

掖垣疏草故工科給事中馬公所著公諱從龍  
字君昇別自號見素青之安丘人公舉萬曆壬  
辰進士歷洪洞高平二縣令以治行爲天下第  
一徵入南垣旋丁外艱服除補工科冊封周藩  
事竣遷刑科以母郭春秋高辭官終養物志兼  
盡人稱其孝在籍起通叅起尙寶卿大理丞皆  
不赴公通籍五十年在官八年餘俱家食難進  
易退士論歸焉公嘗以剛直忤奄登萊軍興公

適爲寧陵之行監軍中官喉令某誣以倡逃遂  
下詔獄欲寘之死烈皇尋寤僅遣成都勻時天  
下大亂塗路梗塞家人力沮其行公不可曰君  
命也毅然就道抵黔南彼中臺察念公貧病欲  
資送北歸合數百金以爲贐公固辭弗受當事  
者謂公不爲囊橐計獨不爲饔飧計乎公曰使  
吾在職官稍易其操當不至此諸君乃欲我以  
褻晚故取看囊一錢邪公舐脰萬里輶軻百罹  
甫及里門聞流寇陷京師卽攜家南渡僑寓句



容亡何竟壺鬱以卒。遺命葬其地。聞者皆斂色。正容以爲今之謝君直。鄭億翁也。公沒已歷三世。曾孫大令庭符。搜討遺文。得疏藁三十五篇。鏤版家塾。而辱貞爲其序。竊惟公生金張世胄之家。稟天地清淑之氣。當其服官壯縣。廉潔自持。不以一介入筐篋。不以一帛充衣襦。及擢諫任。朝右望見公衣冠。以爲有異。至其方巖峭。獨芒寒色正。海內敬仰。不啻五緯之在天也。其職論思。值神宗倦勤。臨御稀簡。萬幾望廢。雖處日

中月滿之時已成土崩瓦解之勢公殷憂軍國  
結念君父遇事感激意氣空涌簪筆飛章若矢  
之激弦星之奔杓莫可禁禦必不以時不可爲  
而少貶其振纓奮袂之氣也欲紀綱之整飭也  
則有力致昇平之疏以時政之缺失也則有亟  
圖省改之疏屏斥儉人則有邪臣久干清議之  
疏保護善類則有鑒別忠直以終任使之疏且  
有省織造之疏以戒奢侈飭荒政之疏以救菑  
傷嚴驛遞之疏以蘇民困又有府第估值太濫



及乞禁陳設冗費之疏。以杜侵冒。公指切時事。無慮不周。而尤以裁抑宦官。植培單赤爲本旨。每草疏入告。伸紙屬筆。暢所欲言。不假膏飾。未嘗回互。公之忠義固本天性。寔亦道德性命之學。講之有素也。始公雅慕呂叔簡先生之學。遂納履其門。當太恭人在堂。歲必一赴函丈。終以太恭人故。卒卒往返。未能久侍。卽先生沒。亦僅一奔喪而已。及太恭人以天年終。公卽盡室僦居寧陵。期盡哀。其遺書讀之。以蘄有獲。刑禍利。

祿豈足動其中哉。由是知公卓然爲命世真儒。不獨篤孝純忠。驚耀青史。卽其鏃厲學問。鄭重師傳。亦近今所希有矣。先夫子與公少相知。夔長締姻好。公晚年家居。晨夕過從。時貞未成童。先夫子每令出拜。被公拊摩。逆數曩昔。十有九閨矣。捧讀遺稿。如聞歎咤。如見須臾。俛仰之間。能無溪恫。故采其學術風節。并出處梗概。以爲序。使後之尙論者有攷焉。康熙三十五年三月三日清明。同里姻家子張貞謹序。



嘗讀六一薛簡肅公文集及東坡田表聖奏  
議諸序喜其敘事詳整簡練兼有變化真史  
筆也讀先生此序不薄今人變古人矣程叔才  
忠孝二字是馬公平生大節至其杜侵冒省  
浮費諸疏又皆與宦官爲迂尤見立朝風槩  
篇中明言暗伏一一傳神真有關係文字體  
裁高古法度謹嚴猶屬餘事耳王清遠





夢園倡和詩集序

當吾世而有兄弟竝以才名鵲起江淮閒者則  
渠菴覺堂兩汪先生也渠菴清和婉篤弱不勝  
衣經明行修蔚爲醇儒覺堂早登甲第出入館  
閣回翔郎署且生而魁壘以豪傑自命指畫天  
下事數着可了兩人若不相爲謀者至其惇倫  
理重交誼沈潛于風雅汜濫于詞章則誠伯仲  
也壬子之夏余游學都門獲遇覺堂淡相慕悅  
遂與定交每過門下馬譚諧閒作畱連夜分尤

喜讀余文長吟誦不忍釋手求其是正卽點  
竄評隲朱墨狼籍至今手蹟尙藏篋中比余東  
歸書問促數月必再至瑣屑細碎無異覲面逮  
其罷官草猝出春明猶遺書寄余付屬鄭重開  
函循覽令人有一人知己之感余交桀莽在甲  
子之秋雖後覺堂十年而歡若平生未嘗少別  
良以相期之久相望之切故一見莫逆不自知  
其傾蓋非故也余乙丑南來訪兩先生于家執  
手話舊數共晨夕見其內行淳備家庭藹然有



連棟聚食之風及酒酣鐙炮此唱彼和又深得  
夢草對牀之遺意越六年辛未余再過維揚覺  
堂卽世歲星已周余服朋友之服哭其墓上入  
唁渠莽相與登見山之樓如覩顏色如聞履聲  
徘徊俛仰當饗而歎渠莽出眎夢園倡和集一  
帙乃會粹兄弟平日訓贈之詩也請爲其序余  
摩挲遺編廻環吟咀于良朋銷殞之餘追憶定  
交之初有如昔夢依然往劫矣余九歲而孤終  
鮮同氣見人兄弟偶語輒心情慘抑謂爲人世

難得之樂。況觀其手足零落。邑鬱無聊。排續篇章。用以寄人琴之慟者乎。縱欲伸紙吮筆。以序其事。十句九慟。不能成聲矣。因述我兩姓游好始末。書諸卷後。姑存灼艾分痛之意。若夫詩之輪囷結轆。纏緜惻愴。讀之增友于之重者。當世君子皆能道其所以。亦何待于余言。渠荅解人定當不昧斯語耳。康熙甲戌古重陽日。牟山張貞序於廣陵僧舍。

用合傳法爲序。深得古人遺意。篇中敘二汪



處有分合有詳略散而能收整而不板跌宕  
已極至後幅自述一段情淡意痛發爲和平  
繚繞之音神似歐陽永叔矣

陶季漢





西城別墅詩序

昔人有言。五百年得名世易。得文人難。余謂家  
庭間得文章之士尤難。于得功名之士。如唐之  
劉蘇李房宋之范韓曾呂。皆父子相繼爲宰執。  
其他躡踵而爲公卿者。不可遽數。至父子以文  
章名世。則指不多屈。有唐文章鉅公。無過杜韓  
子美。屢以詩勉宗文宗武。而二子之詩。無傳。退  
之三子。綰袞皆擢第。袞爲狀元。退之名若斗山。  
而不聞世有狀元袞者。亦文章難于功名之一。

證也。今之詩文冠一世，而海內操觚之士尊之，無異辭者，莫如王少司馬阮亭先生。先生有才，子曰清遠能世其學，蓋先生以名世之才從容館閣，游歷卿貳，一話一言皆載國家之元氣，以出翰墨風流，可以籠挫古今，陶冶萬物，而況爲其子姓者乎？清遠天資卓偉，蔭藉高華，目擩耳染已加于人一等，而游先生之門者又皆海內勝流，清遠與之講習磨礪，所造益深，是豈囊書生聞見局陋者敢望其涯哉！故作爲聲詩汪洋



淳。澹。清。麗。閑。雅。稱。其。家。學。于。是。詞。宗。詩。老。希。風。  
說。響。者。莫。不。推。轂。辟。舍。而。歎。先。生。之。有。子。也。夏。  
日。偶。過。其。讀。書。齋。出。新。詩。一。帙。屬。序。乃。清。遠。自。  
詠。園。居。者。閒。澹。高。古。視。平。日。更。進。一。格。旋。游。其。  
別。墅。幽。邃。紆。餘。無。穹。閣。傑。屋。之。觀。有。荒。山。野。水。  
之。思。然。後。知。清。遠。因。心。造。境。卽。境。會。心。而。詩。之。  
境。地。故。自。不。殊。也。夫。文。章。不。易。能。而。清。遠。之。所。  
就。已。如。此。使。極。之。而。播。爲。雅。頌。以。薦。郊。廟。著。爲。  
謨。誥。以。施。朝。廷。文。章。當。緣。功。名。而。益。顯。況。功。

名。又。君。家。之。世。業。也。可。弗。念。諸。清。遠。請。序。甚。殷。  
余才盡志衰媿無以相長聊述其淵源所自并  
致期勗之意云康熙庚午冬渠丘張貞序

議論皆臻絕頂而文字亦推偉不羣

安靜子



楓脂香堂詩集序

余病牀餘兩月雖寒熱交至而熱爲尤劇每當  
熱作如騰猿狂象不勝其苦友人教余默思平  
日所歷清涼之境可已斯疾因憶昔游越中嘗  
于月夜登飛來峯涼颼微扇聽巖下泉水泠泠  
時在初夏肌膚起粟亟下坐冷泉亭亭畔松影  
參差如水中藻荇自謂清絕後又登琅邪之山  
下臨大海值宿雨初收纖翳不起空明澹蕩一  
碧萬頃風起瀾生山趾動搖不自知其置身何

所斯誠天下之曠觀也已又嘗秋日邨居以瓦  
泥塞戶蒼蘚滿庭綠陰覆屋午夢乍回茶亦熟  
矣萬籟俱寂唯鳥嘒蟬噪洋洋盈耳可稱妙音  
及入山路潦水方盛陰厓幽壑層層傾瀉或澎  
聶澎湃或琤琤灘湔解衣盤礴塵慮盡滌斯誠  
天下之清響也已又嘗得長興廟後新芥以天  
泉瀹之才一注水栢杓自馨不必七盃始風生  
兩腋自謂足雪昏滯矣一朝晨起跋履林園見  
花閒曉液玉垂珠湛掬而飲之九竅皆香斯誠



天下之至味也已。癸酉春日朱君子青投贈嶺南端江二集。余受之。卒業淡而不鑿。雄而不抗。靈迴超脫。自成一。家變幻百端。了無迹象。近代比儼塗飾之雲霧。埽除盡矣。已爲心折。旣又得其楓脂香堂全集。讀之。然後知其天質高師法古。蓋溯源于漢魏。涵泳于三唐。而跌宕于宋元者。余尤所心醉者。雖散華落藻。金春玉應。而清冷之氣。隱見行墨。每一展卷。若揖古人于煙霜冰雪中。此放翁所謂使人欲學而不得。欲贊而

不能者何幸于吾身遇之哉斯誠天下之真詩也。已噫曩昔勝賞無異野鳥篆空飛鴻蹋雪過眼已失今臥病荒邨仰眠牀上看屋梁而呻吟惟楓香一編長畱枕畔病小極時用當七發誦其雄以奇者如山月當頭闌風吹袂恍然上下飛來峯游眺東海斥也誦其幽以峭者如疎柳鳴蟬空山放溜恍然臥聽松風坐臨秋水也誦其芳以潔者如新茶潑乳甘露沁脾恍然共試金芽獨餐沆瀣也平生境遇莫可追憶者眼底



胷中一時俱集不覺積疴頓穌翕然而起適子  
青來徵詩序既不獲辭遂書此應之康熙甲戌  
秋分日安丘張貞序

前半層層發論似與本題無涉後面一一應  
轉便覺縹緲煙波皆成實際真空中造五鳳  
樓手也至鍊句設色處錯綜變化清令沈着  
則又別有天地非人間矣不唯爲序文中絕  
調卽在先生集中亦稱傑作

朱其恭





周榕客學菴詩稿序

吾師櫟下先生節鉞青齊癸卯夏手一編示余則所著賴古堂詩也余拜受之退而卒業見其削獨雄秀不名一體至其遣辭皆未經古今人道且多古今人未易道者余躍然以起聳然以服而不能出一言以贊之既讀虞山序文謂其情淡而文明言近而指遠包函雅故蕩滌塵俗卓然以古人爲指歸余竊歎爲知言榕客爲吾師中子一日出其學菴詩稿屬余論序余觀卷

中之詩磅礴鬱積清麗閒放一以爲陣馬風檣  
一以爲飛泉駭瀑寫景幽寂有蘭茝之潔言情  
華潤有桃李之豔於乎何其詩之似吾師也因  
思吾師負蓋代之才凌暴偃蹇淹玩衆作不限  
常律操捨自如是其有異人之資稟也早登仕籍  
數歷中外前代故實無不貫涉

本朝憲令無不審據且晚經患難人情事變洞  
晰胷中是其有異人之遭逢也至若耆書又其  
天性上自經史諸子百家之集下逮稗官野乘



旁及道釋之書殘章斷簡靡不山聚林列且窮  
極日夜之力鉤索質驗貫殊析同是又有異人  
之聞見也吾師之爲吾師者如此是可易言似  
歟然有說焉溪山大澤寔生龍蛇榕客蔭藉高  
華胚胎前光是其才具原自無殊也國家典  
故人事變更榕客於過庭之餘耳之已熟與其  
身歷無少差別也至圖籍之藏匱滕匣祕充仞  
積累不必搜奇抉怪但伏而讀之已有餘矣是  
其聞見又略相同也然後知吾師之創起者爲

或語

難而榕客之承傳者爲易使起虞山於今日必  
且以目吾師者目榕客謂其詩之似吾師也得  
毋亦以余爲知言乎康熙癸酉八月丙子安丘  
張貞序于甓社湖舟

謂榕客之詩原本櫟下先生只是兩層文字  
其中由似說到不易似由不易似說到易似  
回環繚繞便覺有無限煙波無限曲折是之  
謂真古文是之謂真大家

宗定九



安青士綺樹閣賦稟序

賦於何昉其風雅之遺音乎古者諸侯卿大夫  
交鄰聘問必有詩詩卽賦也往往見於春秋春  
秋以後聘問詆譌不行於列國羈窮之士間因  
失志而有賦屈宋之騷是矣騷亦賦也兩漢而  
下賦家輩出賈生長卿之徒長於敘事矣說者  
猶謂其昧於情子雲長於說理矣說者猶謂其  
略於辭至於孟堅世推雄博而說者猶謂其辭  
理兩失若是乎賦誠難言之矣閭丘安君青士

吾友靜子先生介子也少年矯志博物好古既以其所應時制著場屋聲更以餘力泝洄騷雅下上漢魏溢爲詩歌則餘膏賸馥猶足以驚爆海內辟易作者此誠家學所被源深流長未可以膚心末學跂而及之也去年青士與予遇稷下出所爲賦若干篇以求是正且請爲序予披讀一過風氣適警興寄婉愜名章繡句絡繹奔會於行墨之間語象則星漢昭回雲霞卷舒也語致則文漪淪漣緒飆搖曳也刻羽雕葉不足



爲之工。鶴鳴鸞嘯不足爲之韻。銅九走坂駿馬  
注坡不足爲其流暢也。由其才無不兼。故美無  
不備。予回環雜誦。神懷欲飛。尙復何言。無已。姑  
取青士之以綺樹名其居。名其集者。以進論之。  
可乎。予杞城種樹者也。久與爲伍。能窮其變。當  
春氣方殷。萬花爭發。黃者紅者。黑而澤者。紫豔  
而腴者。翠白而細綠者。衆彩交揉。焜煌變幻。可  
謂極難名之妙矣。抑知此有本焉。蒼枝老骨。天  
矯勁挺。或根到九泉。拔地千尺。擾雲漢而挾風。

雨寔錦綺繡錯之所由生也青士持此以求則  
不僅紛紅駭綠徒夸騷圃之工露葉風葩謾鬪  
文園之巧矣青士不由是遠乎用爲書首并以  
質尊甫靜子先生或亦當默相印可也康熙丙  
子驚蟄日杞人張貞序於自來草閣

文章須通經學古攻苦數年自立根柢然後  
組漢緯唐以爲華葉此園叟自得三昧用告  
青士眞金鍼度人矣不特始頌終規爲作序

正格也

邵子湘



張氏闡牘彙存目錄後序

由明迄今餘三百年皆懸帖括以繩天下士程  
式既定。凡世之欲就功名者。顯顯然知由此而  
入。則爲正。背此而趨。則爲邪。雖別有弋獲人不  
爲榮矣。故有志之士咸潛心其中。卽父兄之訓  
誨。師友之提命。亦未嘗舍此而別有所屬也。吾  
家自高大父武安公以經術起家。其後曾大父  
東津公。吾大父贈司理公。皆承傳家學有聲庠  
序。必不肖以困躋于名場而遂自廢其業。至吾

世父孝廉公始以萬曆壬子舉于鄉吾叔父侍  
御公亦舉天啟辛酉而成進士于崇禎辛未先  
府君雖以明經老而庚午之役大爲當事者所  
激賞詘于定額故置乙榜寔非以其文有明月  
之類夏后氏之考也會晝日無事料簡篋笥得  
壬子鄉試經書義七篇庚午副卷與辛未會試  
經書義各如其數辛酉鄉試僅存書義二篇附  
小子貞及兒子在辛壬子丙寅拔貢試牘各二  
篇合之得二十七篇刻于家塾使後之子孫讀



斯編者知我諸父顯晦不同出處各異要皆龔磨乎事業奮發于文章自時厥後縱猥庸不肖隕其家聲猶知恪守先訓終不敢由他塗以進也。

段落分明規模次第望而知爲有律之師

青昌

五十六

五



江都韓翁白五十壽序

康熙甲子余游京師時在壯年腸肥氣盛傾身結客一日飲比部汪君邸舍座中有客神觀駿發視精行端文章之氣隱現于睂目間灑然異之問其姓字則廣陵韓君醉白也尊甫文適公乙酉之歲以身殉國母蕭太夫人以身殉夫君是時才三歲耳托命家嫗以得活生而權奇倣儻爲童子時已受知于郡司理王阮亭先生及補校官弟子不惟制舉之業著場屋聲而詩古

文詞亦稱雄海內。旣而北游太學時，阮亭先生復爲大司成，合天下士試之。拔君第一，六館才儁皆以之爲職志焉。公卿聞人多折節下之，爭相延致，以得一當君爲幸。而君自若也。余旣傾倒于君，君亦暱就余。自是遂成莫逆。余歸未幾，比部以蜚語被逮。時事方急，傳聞異辭，道路洶湧，知交裹足。親串退縮，卽平日廝養僕隸，受恩最深者，亦驚皇避匿，無敢出一語露半面者。君獨傳古誼，微服赴難，爲之偵消息，具橐餱終始。



左右事竟得白。比部感且次骨。與講朱陳之好。而君以爲友朋之道。應爾未嘗幾微。見顏色也。長安公卿聞人向之以文章嚮慕君者。至是又相與高其風義而益親之。君則掉頭亟歸矣。辛未之秋。余再游邗江。衰遲晚晚。疾病侵尋。意氣銷落。回思曩日之聲氣。應求文酒。過從依然。往劫矣。望知交之門。輒不于前。却獨訪君子家。君亦相見。驩甚。延入東軒阿房。砥室夾窻。助明花藥。分列庭竹。翳如自汲水灌洗。有楚楚可憐之

色君之獻酬羣心者不惟翰墨淋漓詩卷填塞  
雅頌之博徒必詣門以求通卽鄉里之質疑朋  
友之急難皆奔趨望走如有期會君出片語應  
之人人得滿意去良以君少經坎壈天運人事  
盤互叅錯皆足以磨厲其心志長益其神智故  
于古今事變如列符券如懸鏡鑑胷有定識肆  
應不窮非徒恃其炙轂之智聊取給于睂睫間  
也因思君有才如此甲第可以戾契致功名可  
以趲步成況年甫五十正古所謂宜爵而服官



政者迺君有本分之官顧獨高不出之節江淮  
之間俊人豪士從君游者皆勸之仕君不答惟  
仰面看屋梁而已諸君子知君之不可強也而  
姑與之飲酒明年上巳是爲君皇覽之辰又將  
稱觥上壽而侑觴之文則以屬余以君嗜余文  
之深也余何敢以世俗祝嘏之辭進唯書余之  
知君者以復之遙想其時花明草熏風物駘蕩  
家列長筵門喧駟馬賓主酬酢笙歌告備有褐  
衣席帽持卮醪而拜堂下者必余也此時諸君

子還。有分。末座以酌。我否。

無一字似壽序。寔無一字非壽。醉白者。首序其堂上。殉國殉夫。凜凜忠節。次序其生平。急難重友。忘軀。是皆可以致壽之由。俯仰低回。得情得體。誰謂壽文不入選邪。

何陋齋

似記似傳。筆意最歷落。可喜如此。作祝嘏之詞。庶無損于性情。

安靜子



樊會公畫卷題辭

金陵形勝甲天下。靈人秀士往往生於其間。而今之稱遺民宿老者。無如樊君會公。蓋會公生江南山水之區。而性復好學多識。前言往行。法書名畫。嗜若饑渴。於故家所藏唐宋真蹟。臨摹殆徧。棲心既久。遂自名家。至其爲人。落落穆穆。不知有人。世機械事。與余定交。餘三十年不變。辛未秋杪。余再游白門。訪會公于家。其居爲前朝徐中山東園曲徑。橫塘竹畦。菜圃雖在城市。

全似邨莊。余隔離呼之。會公自出。應門步履輕。  
安須麋雪淨。相見握手成歡然。一笑也。及入其  
室。殘菊猶馨。茶鐺方沸。父子各據一几讀書。作  
畫門外。跣塵賓主俱忘。又不覺憮然自失矣。既  
而出一卷示余。乃其子青若乞寫藏弄者。匠意  
經營。煙雲渲染。饒有米虎兒筆意。就窓展眎。不  
禁瞪目叫絕。畫家之有南宮。數文猶書家之有  
右軍。大令也。青若丹青妙。有家法。今會公寫此  
付之。似默寓代興之意。青若其知所欽承哉。



予與樊氏昆玉交最久誼最深往居東園時  
會公晨夕相過興至則捉筆拂紙豪無倦色  
三十年來予僵臥白雲咫尺千里而杞園游  
轍所至獲與定交且爲題所作畫卷應詰享  
青若之請知卷中巖壑必有大過人者乃得  
杞園之瞪目叫絕也未獲一見念之惘然白  
雲自怡

文有画意寫景最爲幽靚中有高人逸士呼  
之欲出也

安靜子





程萬斯印冊題辭

昔人有言不讀萬卷書不行萬里路其人必不能文縱能文亦兒女語耳印章雖小道吾謂與此政同一關揆老友程子穆倩家本黃山長居廣陵晚寓白下皆通都大邑而好學又其天性無所不窺卽無所不記所謂讀書行路者旣無歎于昔人之言而又得從黃石齋倪鴻寶諸君子遊熏染其流風緒論故發爲詩古文詞往往入古人堂奧溢爲圖書篆刻直徧先秦兩漢人

知其詩文篆刻之妙而不知有其所以妙之者在也。余與訂交垂三十年。今來建業握手話舊。得晤其少子萬斯。意氣英發。風神韶令。鐫刻圖章。具本家教。及索印本觀之。奇而不詭。于正放而不離乎法。穆老妙技。頓還舊觀矣。吾願萬斯念品節文章。爲乃父篆學所由基。卽由此而溯其淵源。一如古人之讀書行路。以成其爲文章者。將先秦兩漢不難至矣。寧僅爲克家之肖子邪。



凡屬斯籀則曰古文金石剔鏤則曰印章既  
儼然以文章稱寔貴專家無疑矣萬斯克紹  
家學而猶勗以品節讀書是正深知垢區老  
人者

王安節

每于小道說出原本極似涪翁諸題跋

安靜子

五言

三



錢波齋印冊題辭

予性癖印章每過作者之鄉必以物色求之然  
時流往往不可人意今來廣陵念穆倩亦步而  
後篆法中絕矣偶于友人團扇上見一二小印  
精芒光怪奕奕射人問之則出錢子波齋之手  
亟扣門相訪拊臂促剋歡若平生索其藏本得  
白書越東長壽院十二觀詩各冠以篆印繙閱  
未竟駭神奪目口呿不合者久之鍾記室論十  
九首謂其驚心動魄一字千金儼以波齋所作

差堪無愧將與袁州廟學法慎律師諸碑世之  
所謂三妙四絕者共傳不朽寧僅與程吳兩君  
鼎足分峙而已邪甲戌古重陽日牟山張貞書  
本說波齋堪與程吳鼎足前後映帶便多丰

采  
顧天飛



安丘縣學重修西廡記

近代學校之制，廟事孔子而祀七十子之徒于兩廡，天下通義也。安丘學宮，創自元建元中，二十八年重建正殿，三十一年始造兩廡。有明以來，益加增飾，學舍講堂次第興葺，然亦再修再圯，毀置不常。鼎革之後，化爲飛埃，鞠爲茂草矣。迨入我

清，文物寢盛。順治十四年，邑侯徐公謂第更新廟學，以財力告絀，獨遺西廡。康熙三年，邑人黃

封君胤茂自損橐裝營繕崇成壯偉閎耀既歷  
三紀漸就阨靡三十一年邑侯陳公猶龍廣文  
李君瑞陳君鳴珂共謀繕治各捐奉緡爲之經  
始而邑中縉紳學士復率其私錢以攸助之已  
量工命日矣封君之孫惟熙慨然曰維此西序  
吾先祖之所意締而手啟者也再以煩鄉先生  
暨父老子弟是子孫弗率有忝祖考矣于是糾  
役徒料木甃塗墍之湮滅者新之櫟題之覆橈  
者易之補其罅漏正其傾斜不變其舊而煥若



更始可謂無侈前人無廢後觀矣于其成也惟  
熙從余求識其歲月余聞歐陽子之言曰事不  
患于不成而患于易壞蓋作者未始不欲其久  
存而鬻者常至于怠廢今觀惟熙之克繩祖武  
其見于建置者已如斯使推斯意也念爾祖而  
修厥德則作者已成之事猶有患其易壞者乎  
猶有患其怠廢不存者乎當不僅廟與學之輪  
奐常新矣惟熙勉之吾竊願鄉之子弟共勉之  
也故樂爲書而俾刻諸廡壁以俟康熙三十二

夢言

年歲在癸酉正月上日縣人張貞記

老靠

王山史



重建歷下亭記

貞當童羈有事濟南往游蓮子湖流津委浪城  
趾動搖蒲綠蕉紅芳妍茂密單舟疊舸各出菱  
蓮中如在吳越奇麗之鄉湖湘清幽之曲使人  
忘其爲都會地也顧獨無樓觀臺榭爲游人燕  
紆往來之所遂不得寄目騁懷微以爲恨及歸  
披閱圖志知其地舊有歷下北渚嵐漪水香諸  
亭又得北海少陵南豐樂城詩歌讀之慨念名  
迹不勝色飛是後行役必過湖上見有洲渚孤

峙中央則歷下亭故基也周尋遐覽歎嗟徘徊  
不能去數年以來閒復過之蒼煙白露無異誰  
昔每思勝地非人不興安得鉅公大人來蒞茲  
土廢修墜舉使前人勝蹟頓還舊觀用以慰吾  
思而償所願也哉

皇帝二十九年春 詔以喻公觀察二東六郡  
之衆悉受束約公禋身廉正於法鮮所操舍中  
外上下洞徹若鏡而舞文墨吏上豪大猾見之  
盛夏如負霜雪馴謹吏民就之如勁寒而曩陽



春治理流聞聲徹。黼座是時轉運李公亦以  
勲戚世胄治鹺濟上公仁心爲質敷政優游剔  
蠹卹商惟持不擾之心以御之而國課辦集  
隄於常額二公旣應期名世又皆博學能文章  
凡士之負一才名一藝者莫不被其獎拔遠近  
士人雲合景附彬彬然見鄒魯遺風焉兩公爲  
政之餘從事游觀以休暇日謂歷下一亭寔昔  
賢作息之地存則可以式前修寓禮教廢則無  
以畱典型肅觀瞻茲亭所繫誠匪細故于是謀

同心協若出一人。李公經其始。喻公贊其成。不徵一錢勞。一民四旬而訖事。步檐周流。繚垣交屬。極幽遐瑰詭之觀。俯視澄湖。亦爲增色。說者謂不異歐文忠之築豐樂。史光祿之營峴山也。今

天子聖神。文武力求治平。如兩公者。將以經綸之才。任天下之重。必且揆一時之宜。舉待興之典。名著廊廟。澤被寰區。其功烈壯偉。與日月爭光可也。一亭之微。曷足道哉。貞捧喻公徵文。



之檄滌筆作記。因思公之僚佐一時故多賢者。相與仰公之德。景公之行。北渚嵐漪。諸亭不難次第脩築。再有摛辭以志其盛者。知不能不推原所自始矣。喻公諱成龍。字武公。李公諱興祖。字廣寧。俱奉天人。康熙癸酉三月己巳。安丘張貞謹記。

首尾相綰。脈絡相生。極盡刻露清秀之趣。最好。是干涉兩公德政。卻無一點塵俗氣味。此等文法。全從有美醉白諸堂記得來。

洪去蕪

聖天子受天而有天下  
有天下而後有土有財  
有義有禮有智有信有  
忠有孝有悌有節有  
義有禮有智有信有  
忠有孝有悌有節有  
義有禮有智有信有  
忠有孝有悌有節有

聖天子受天而有天下  
有天下而後有土有財  
有義有禮有智有信有  
忠有孝有悌有節有  
義有禮有智有信有  
忠有孝有悌有節有  
義有禮有智有信有  
忠有孝有悌有節有



唐邵鎮重修三官廟記

先大母王太孺人世家昌樂之唐邵鎮卽吾邑  
西走青州道也先大人最篤戚誼每入郡城必  
過外家與諸親表相周旋畱連浹日而後去凡  
竟內之阡陌祠廟杖屨殆徧及予成童先大人  
已捐館舍予有事西征閒復過之見綠樹連邨  
斜穿一徑石壇幡影隱映朱垣則三官廟曠也  
每至其地夕陽在山僕夫況瘁解裝就憩如止  
頓舍周行廟庭徘徊瞻顧輒令人興先澤之思

焉。予少壯至老數十經過。或見其棟橈。或見其  
柱腐。嘗歎斷垣缺甃之不可復爲也。鎮人某某  
心焉傷之。乃謀更新醵社會以斂金錢。不三年  
而足用。興葺其敝壞塗墍其漫漶。堂階戶祀髹  
丹粲然。三神者峨冠盛服。光明偉麗。將吏武士  
陪擁四旁。浸起舊觀矣。復以餘資創後殿三楹。  
塑神之父若母。巋然當坐。三神就列。若聚家人  
于一堂而共話團圞。報本反始。亦禮之以義起  
者也。自今以始。非獨清曉齋蔬。黃昏鐘鼓。可以



華非心迎善氣且于此聚族于此容衆相與講  
守望而修親睦其爲福于一方者當不爲少矣  
旣訖事鎮人王迭扣門訪予求文以識年時因  
思其地爲吾家三世舊游而來句文者又予之  
中表兄也雖欲以不文辭不惟不敢亦不忍矣  
故泚筆爲記而刻施者姓名于碑陰云康熙壬  
申處暑日安丘張貞記

初讀之似不甚經意及捉筆則終不可過斯  
爲至文

李渭清





安丘三教堂營造記

東方之水獨爲吾邑所有者稱浯汶焉二水出朱虛自西南來浯水入境逕行城南其陰多山往往險絕有奇致汶水過柴阜卽北折而東繞出城後又一水自西北來曰小汶河兩河所夾洲渚曠邈林樊縈錯數十里之內未嘗有山而西南之山皆若拱揖於庭戶獻酬於几案者則三教堂也其地爲王子清心別墅清心少厭囂塵辭遣家室寄迹老子法中爲道士其世父爰

質施地十畝以爲之居清心卽除地而宮之創  
起高屋三楹其從三十有二赤加其二以爲之  
修加其六以爲之廣中象三旁象六是曰三教  
堂繚以周垣翼以廊序規櫺甫具而清心化去  
以其弟子袁一美領其事一美志節清苦朝夕  
一菜茹冬夏一木棉裘日以怠廢先業爲懼遠  
近之人翕然歎譽施者牆立而廡至焉復起前  
殿三楹奉漢壽像設宏傑牢堅略與堂稱舊日  
之門庭房奧增修塗飾丹碧粲然于是棲經有



室館客有堂熏浴炊爨帑庾委積各有其所供  
具械器無一不備至於種藝疏鑿游息休暇則  
又修竹覆門長松引徑莫不極思致區處之妙  
安丘之道宇遂以是爲冠旣落成一美介友人  
以告余曰願有紀以爲無窮之傳會余多故未  
能屬稿後三年一美復款門來請屢返不厭乃  
敘載其本末如此然不能無槩於中焉世之高  
門巨室明德茂勲爛然天地一旦溘焉朝露爲  
之子姓者驕樂佚游翫歲愒日前人風烈置若

罔聞求其才堪幹蠱力足肩構者指不多屈今  
袁子褐衣黃冠棄家從師非有勢可席有權可  
藉勤身苦志確守其教卒能不動聲氣於數載  
之間成此高明壯大百年累世之迹半山老人  
所謂失之此而彼得焉者不今古一轍邪

前半敘事散散稜稜如米襄陽書法後幅借  
題發論悲感橫集可謂絕調

李渭清



游廣福寺記

青州之南多山。游青州之山者多至雲門而止。卽余亦然。康熙己巳余客青州適余妹壻高舜木譚廣福寺之勝遂于重九偕舜木及兒子在辛往游出城東門折而南甫至郭外微雨忽作就路傍閱武堂避焉壁間嵌王弇州先生堂記讀之雨止南行里許經前大司馬郝崑田墓上讀申于兩文定公所作碑表及碑陰所載諭葬儀節想見當日榮哀之盛曾不百年木石已爲

子孫賣盡唯殘碑，四五石罨數事離。列而巳過，  
此卽雲門東麓路。轉峰迴看劈駝諸山，成嶺成  
峰，別開生面矣。西南過響水厓澗，底石版自南  
而北，層層跌落。知秋水壯時，砰訇澎湃，必極佳。  
觀山上怪石如牛馬如熊羆者，不可殫紀。園冶  
間，得其一二足稱奇玩。棄置荒山，遂無知者可  
爲太息。越數嶺，復折而西，乃得寺焉。自郭外至  
此，多樹柿，柿葉經霜紅黃相間，爛若披錦。寺畔  
山深風緩，故諸樹青蔥敷榮，有如盛夏。唯朱實



離離差不似耳。寺居劈山左麓山半平臺上。三面山環其境勝絕。但舊迹久湮。所存像殿皆舜木。先人納言公所成。今去世已遠。郡中鄉先生無復好事如公者。故亦漸就傾圯矣。七十老僧折足鐺中糙米飯。有時不給。山行疲剋。無房可憩于西院松下。得一石案。頗可人意。據而坐焉。舜木出所攜肴核。噉之饑甚。而齟齬作痛。咀嚼頗難。食未畢。雨驟至。白雲滃鬱。隨風伏起。互相明滅。俄而煙霧滿庭。咫尺莫辨。令人飄飄有凌

雲之氣似游天地之間意雨止周視殿庭見碑  
記載有魏武定二年齊郡太守劉明世造石像  
碑刻及仁壽中所刻舍利塔下銘覓魏刻不得  
于天王殿故址得隋石讀之蓋文帝建舍利塔  
佞佛祝釐之辭而孟弼書之者文頗雅馴字穠  
勁饒古意非篆非隸真八分也刻法甚精歷唐  
宋元明迄今千有餘年猶完善如新亦大異事  
第臥頽垣風日中恐難長畱茲蹟永鎮山門也  
日已下春遂冒雨歸至于家河邨中止一石徑



經雨路滑馬躑躅難行乃舍騎踏泥而過將入城回望南山濃如染黛矣

游記用回望南山濃如染黛一語收住筆似閒而通篇未盡之意俱從閒處逼出天光雲影一清如洗儼然此記文境也

王司直





游揚州劉氏園記

辛未閏秋余有幽憂之疾不自聊賴遂爲江南之游中秋日抵邗上寓興教僧舍次日訪李封君君實於家君實約明日爲郊外之飲至期使人持馬來馬頗駿經行衢市足暘人懷大勝籃輿閉置局促如秋燕也由左衛街東行出通濟門呼小舟徑渡河東里許若斷若續皆闌闌也郭外地曲折起伏多小橋流水路傍喬木叢竹陰森蔚蒼境地幽閒心目開爽又行里許路折

而北則劉氏園在焉門西嚮門內藩以竹籬籬  
北得堂曰大玉以庭前植玉蘭一株其大合抱  
春時花發如雪山瑤島稱維揚巨觀故以名堂  
堂四楹敞其三壁間一廚啟之爲門可達室中  
矣庭內東西離列老桂二十許株暖日烘花薌  
氣芬勃別無雜卉惟右方種竹數百挺鸞稍翔  
空色如綠玉余摩挲久之不忍去西南一軒東  
嚮前有立石狀頗磊砢稍南爲廊數楹此外無  
屋宇也主人肅客入座酒十餘行盤殮有斑子



魚味甚美。或謂河豚別種。或謂是其小者。豈卽楊次翁設以待米漫仕而戲。謂爲河豚。質本者邪。飯畢。主人洗盞更酌。余欲改席花下。從之。輕風披拂。金粟時落。洒卮及衿。褰開。令人作衆香國中想。旣夕而散。客有就園南小渠乘舟者。余仍騎馬由利津門入。抵寓舍。街鼓動矣。余念揚人以綺靡相競游者。多在紅橋一帶。茲地亭榭之瑰麗。不及諸園。一棹而幽清曠逸。寔爲過之。欲索解人。恐不易得。故余潏以得一游此。

園爲幸而此園亦未必不幸余之一游也遂燒燭記之

不必鑿削酈柳點染佳勝處頗有放翁筆意  
安靜子



# 游金陵北城記

余癸酉八月來金陵寓承恩寺僧舍既歷旬時頗苦衢市蹢躅煩欲爲北城之游以殘暑猶熾登頓不易而止二十三日爲白露節天道驟變爽氣逼人遂與周子榕客商略同游詰朝就榕客晨炊食已步行里許至文德橋買一小舟時秋水方壯放船東行兩岸樓閣開窗面水雕闌綺疏無異僊居縱棹空明澹蕩中極盡容與之樂東過邀笛步又東過桃葉渡北過白下橋河上

居人高柳覆門短籬曬簪鴨闌蟹舍曲曲繞屋  
矯首鍾山氣象雄麗蒼翠欲滴使人恍然如造  
異境又北經馬貴陽邸舍今改爲佛廬矣與榕  
客談其當年舊事不勝太息折而西復折而北  
至石橋水涸舟膠步履岸上訪龔半干山人於  
家山人年已餘七十布袍苴屨自出肅客問余  
里中諸耆舊知皆下世慨歎不已茶話久之始  
別北登雞籠山絕頂渾儀臺故趾新建一亭藏  
御筆曠觀石刻爲



皇上乙丑南巡所書瞻拜其下天藻飛翔盤拏  
屈強非弄筆儒生所敢望其涯涘東起傑閣繚  
以周垣內貯豐碑記南巡盛典秋高氣清長  
空無纖雲四顧江山城闕樓堦竹樹遠近映帶  
畫圖有所不及徙倚移晷乃緣石磴而下小憩  
茶肆中食餐巴甚美十廟餐巴舊已著名如東  
京夢華錄所紀州橋爿肉乾脯朱雀門雞皮麻  
飲之類也肅衣拜蔣侯祠祠麤存其舊帝王功  
臣兩廟俱已頽寂象設亦不復存爲之感歎餘

廟不及入東登雞鳴寺覓其門不得蓋自余乙丑游後山門已改作離故處北行百步許始得入入門南嚮仍由故道躡級而升殿門就圯意甚危之塏院後閣則興葺一新其地據臺城上北望眞武湖面勢疎豁煙波渺然町畦相接蓮芰甚富遠山隱見煙霧閒而秀色時撲人衣袂眞絕景也塏院西南得一小門循牆北走繞出閣後陂陀逶迤而下直達外門矣日將夕始歸舟次取道一枝巷訪雪客於家一飯而去舟入



暝流宛有幽趣。比到青谿天。且昏黑。水榭人家  
皆已難燭影。射波中如電閃。霞流滉漾無定彩。  
及登文德橋。見長干埵。鐙正盛。光氣熊熊上微  
霄。漢亦奇觀也。

胷懷超曠。意思安閒。尤妙在寫景。筆筆如畫。  
而不拾韓柳唾餘。王山史





游西園記

金陵園池之盛不減洛陽而徐中山之東西園  
爲最勝余自丁巳南游東園毀頓已久某堂在  
某水之傍某地爲某亭之趾僅得于遺民宿老  
之口及屢過之所謂基趾者亦無復彷彿槩然  
而已問西園則中山之後轉徙黃山汪氏今爲  
龍眠吳氏別墅每欲往游以乏鄉導不果癸酉  
中秋客金陵者幾兩旬于其晦日將俶裝北歸  
周子榕客設酒取別言及未至西園爲此行恨

事座客皆相向從與遂挾陳處愚方志高以行  
步走二里許底門知主人久客京下一蒼頭延  
入由其廳事北折入小弄一門北嚮署曰梅嶺  
當門得亭曰玉照爲園中最高處古梅數株離  
列左右草中臥一石舟形製甚奇東北高土爲  
亭榭故陟登之鍾山橫前巒色峰勢森然競出  
循嶺北下一獨木危橋振衣亟過爲海漚亭董  
宗伯其昌書額方沼環之可數畝秋荷尙盛紅  
白萬柄媚色幽芬殢人眼鼻園丁薦茗再啜而



出仍過木橋沿隄西上竹樹旅叢幾不辨路西  
北一小閣供漢壽亭侯象設凭闌下眎瞻渺  
瀰皆在目皆閒爲之一快稍愒由西斥而下路  
旁亂石如羣羊少南一亭峙水中榜曰雲溪處  
對面高柳古榆扶疏掩映綠陰滿園樹中一樓  
屹起朱欄畫楯亦殊壯甃甃繚之以近內室不  
得入園境將窮得徑頗猥鄙南去稍折而東爲  
葆光堂堂東向規櫺弘敞廓然一廣除相對爲  
臺禿松怪石分布其上堂南一閣已就頽廢閣

前石壇上栝子松一株高數仞大十圍皮如青銅根屈曲作虬龍狀下頰三石最高者曰紫煙作蒼白色有明喬太宰字題字其兩石一曰雞冠鐫宋梅摯詩一曰銘石以建康畱守馬光祖刻銘其上故云二石庠于中峰色質亦祇堪作衙官卽世所傳六朝松石也予攷此松乃宋仁宗手植以賜陶道士者石爲宋植無疑然皆已六百年亦不易矣摩挲拂拭躊躇不忍去歸塗復就榕客飲醺然而散一松三石余每見于傳



紀輒骨騰肉飛不意晚始得之戀戀茲勝不覺  
言之津津也

史稱晉武帝問張茂先漢宮室制度及建章  
千門萬戶茂先應對如流畫地成圖強記默  
識四海之內若指諸掌讀杞園諸記始知不  
妄

王山史





游雲龍山記

癸酉秋杪余自金陵由淝水北歸及抵彭城已  
夜矣夙興南望見山容秀拔樓觀重複若亟招  
余往游者問之則雲龍山也於其明日出南郭  
門緣山麓東上有梵刹曰興化寺拾級而升入  
門見大佛自地中出僅露頂及肩已高數丈乃  
斲山椒巨峯所成又塑諸天像設於四旁崑石  
上以一殿覆之其廣袤雄麗亦略與像稱欲於  
此小憩而寺僧俗甚不可與言轉令人思道潛

其人耳由殿西南三折而陟其巔得放鶴亭亭  
雖華敞已非故趾庭中有井名飲鶴泉殊屬蛇  
足然山上得泉寔大不易拂拭壁閒碑版讀之  
皆顯官新刻舊迹了無存者爲之太息少焉朱  
生邁偕余兒在辛至相與凭闌俯瞰山下人家  
場圃籬落高下相接宛有幽致近郊壤地沃衍  
如棋枰蔬畦界道成文綠潤可愛北望州城雉  
堞連雲屋瓦櫛比誠輿區也旋而觀之白門黃  
樓歷歷在目且彭祖有井掛劍有臺以及昔人



攻戰之場前賢觴詠之地無不攢簇離立可指而數又遙而矚之黃河決潁自汜東來蘇子所謂岡巒四合如環而獨缺其西者如故也徙倚久之因念帝業霸圖竟成噩夢文人名媛總化劫灰不特高蹈如留侯雄勇如呂布皆就澌滅雖僊如黃石壽如彭祖者而今安在卽閒有迹可尋亦不過如亞父之冢陵母之墓徒寄意想於白煙涼草之外而已可不悲哉日已將昃循小徑西下過黃茅岡拜四賢遺像觀吳道子大

士石刻登頓巖岫手披荒蘚徧覽前人題名長吟坡老歌詩而歸

彭門近郭之勝無過雲龍山先生至止席未暇煖杖屨殆徧余獲從游見先生上下巖壑其步若飛余每倦矧欲稍愒先生掉頭弗顧也是不惟有勝情兼有濟勝之具矣撰爲游記明竊屑瑟蒼遠紆徐而心目中別有寄託寔在登臨眺聽之外先生真移我情哉

朱旋吉



杞城別業圖記

吾邑東北爲里三十而遙有舊城隄存焉夏后氏之斟灌國也周武王以封淳于公遂號淳于國春秋之初杞并之又曰杞國後滅于楚至今以爲杞城從後稱也丘虛以來其爲草樹蔽翳狐虺竄伏者不知幾何年至明隆慶中周氏始于此施版鋪治廬舍焉後爲族父近峯公所有天啟癸亥乃歸先府君雖苗茨數椽而堂寢庖湍亦略具矣壬午癸未閒毀于兵燹及余之身

存者才十一耳。然僅以之爲饘粥業。歲一再至。或數年一來。來亦未嘗信宿也。康熙己巳。余衰病摧頽。續以骨肉凋索。心慮荒散。人理頓盡。思得幽閼閒曠之境。攝養餘年。遂移家其閒。而杞城別業始真爲吾有矣。杞之山皆在郭外。幸地平衍。可一望收也。擔山雙峯矗其前。峽山嵯嶭峙其東。西望苑延而奔屬者。其牟山乎。岵山。嶺山。稍居其後。則張左右翼而分列焉。汶流清泚。繞出城背。澠水湯湯。自南來至城東北。兩川交。



會而入海。此吾杞之形勝也。城雖廢垣之立者高處尙可二十赤其厚惟倍入城。余家麥畦稻隴在焉。莊通東西大道兩頭各數里皆夾植榆柳清蔭婆娑赤日不下南爲收穫場柴門向之入門北行兩折而至雪廬以雪中葺之故名原有夾室左廡僅存自右穿入回廊再轉而達書室前後兩層松牆限之前室陜長左右皆牕牕下皆竹其形似舟字曰北船。亡友楊輔峭書其額而銘之後室三楹敞其前致頗疎豁庭中襍

蔣玉蘭紫薇階下種蕉兩叢屋後修篁千挺風  
雨時至琤琤作聲扁以孤邨風雨蕭然乃集文  
徵仲書法所成前安冬後安夏視時涼燠爲徙  
居之候後樓三楹爲臥所兩序翼之東安庖湑  
西儲米鹽樓東精舍一區雙桐覆井醴陰滿院  
爲與客夜話處用潁濱桐身青琅玕語署曰青  
琅館屋東起樓三重高五尋取先府君來青閣  
舊扁顏之每到上頭恍若置身星漢覺人世之  
埃壒盡去青天之顥氣自來非僅以檻外諸峯



排闥闌入也。其南相對亦起一樓，用摩詰輞川詩語名之曰自來草閣。閣前有堂曰拙業司馬子長語也。與田夫野老量晴雨話桑麻於是乎在。輔以丙舍，惟藏農器而已。東北得古柳一株大且十圍，擁燠蟠菌寔數百年物，誅茆爲軒以承之。曰餘柳亦摩詰詩中語，取吾家藏籍副本千卷實之一几。一榻一筆一研，熏鑪茗銚外無多物具也。又南行數武有門，西向呀然闢一境，所謂杞園也。中築方臺臨臺而屋，凡三楹曰山

紫堂金陵鄭谷口書榜東闕峽山斜踞牖上每  
當夕曛紫翠萬變始知其妙臺前鑿一大池深  
丈許浸芙蓉菱芡左右皆桃柳梨杏花藥藩以  
闌竹徑益紆徊池南又一小臺高增其半看廡  
外寒玉池池傍高柳亂藤葱蒨相糾山紫堂後  
有地數畷悉栽果樹如榼梨棗檮柿含桃頻  
婆來禽之屬花時燦爛如錦秋後青璣朱實纍  
纍滿枝百羽萃止緜蠻嘲哢弄暄訴淒亦靜中  
一樂也東園之事窮樹中又得一門曰北園有



古文官果一株圍不圓滿形類雞骨皮作爛鐵怪石色亦飽霜雪矣樹下當築一室傍植桃李梅杏榆柳松柏曰桃李陽從其多者命之也大氏吾莊以樹勝宅中之樹以百計園中之樹以千計牆外之樹以萬計廢城之趾邨路之旁橫生倒植不可以勾股計矣此杞城別業之大較也余讀盧鴻草堂圖詩李公麟山莊圖記未嘗不心服其盛而又頗嫌其意止存乎景物也余別業不逮昔人萬一而余之所以記之者則別

有懷抱言念邨墟爲先人敝廬余棲遁于此寔  
存思其居處之意故支撐傾陞修葺破漏僅還  
舊觀卽閒有增飾亦期克副先志而止不敢以  
改作爲能事也于其苟完屬王子安節爲圖以  
乞詩歌于大人君子紀其事復自爲記述先世  
締構之艱難及小子仰承之不易者以示後人  
若謂可與山莊草堂角奇而鬪勝也則非余之  
所以爲心矣康熙甲戌炊熟日杞園張貞記

序杞城旣詳且核中間有褻綴有結構有關



鎖而總歸於述先人締造之艱難古來諸文  
君子往往立言有本末如是彼平泉山莊草  
木記徒侈心耳

李漁邨





杞園寄杞城圖一卷相示爲金陵王安節筆掩  
暎綠羃遠近斐亹遂爲名墅傳神及讀杞園所  
自爲記覺水木清嘉林園曠展不減漁父花源  
矣便欲東訪杞園相與上下來青閣幽尋桃李  
陽散步寒玉池徙倚山紫堂卽餘柳軒而憩焉  
但恨老病摧頽淹頓帷蓐恐終成南陽劉子驥  
耳放筆一慨畱川高珩書





余嘗入京走山東登泰岱之巔縱覽諸山層巒  
疊嶂綵亘數百里未嘗不歎其地之廣土之厚  
而昔聖賢之所由生也及歸舟南下過滄州歷  
清濟南陽橋頭閒明湖綠淨與東峯一帶相掩  
映以爲青齊之勝大略見於斯矣今讀杞園先  
生杞城別業圖記其閒山川秀拔如擔牟岵峽  
諸峯環布周列汶濰二水夾流而入於海是知  
靈區奧宅又在尋常聞見之外當日子厚東坡  
之在黃柳時搜剔其奇壯美其勝作爲記序使

後之人讀其文而嚮慕之然皆苦遷謫去桑梓  
借枝寄迹究非所有孰若杞城去郭三十里習  
先人之舊擴大其規模崇修其廬舍風雨寒暑  
與父老子弟耕漁游釣終其身以樂於斯則又  
非昔賢之所可及也矣至於地旣奇勝文亦委  
婉詳浹克盡其致益信濟南多名上扶輿清淑  
之氣鬱爲光華豈止山川稱瑰異哉康熙甲戌  
季秋竹西保頤居士汪耀麟謹識



琅邪臺題名

康熙辛亥有事日照取道海濱訪劉子羽於家  
與之同登琅邪是日重陰海霧山雲鬱蒼逢淳  
只赤不見前後人波濤鏗轆聲自地中出歸塗  
大雨宿子羽南園詰朝旣霽復往游焉臺畔秦  
皇車道大將壇坫蹤蹟猶存再陟山椒披剔相  
斯篆碑讀之矯首東矚海山隱現島嶼蒼茫覺  
方壺員嶠呼吸可通幾自忘其腐肉朽骨矣時  
五月廿三日也安丘張貞

韜光菴題名

北海張貞來杭。浹月兩過靈隱而未獲一至。韜  
光終屬闕事。於將歸之前二日偕海曲李宗周  
先生補游焉。遇雨冷泉亭良久不止。冒雨而登  
及抵菴門。衣裳盡溼。借老僧敝衲衣之倚樓肆  
眺湖山城郭。平日履舟之迹歷歷在目。如久客  
欲歸。聚一時之朋好而相與言別也。豈不快哉。  
康熙庚申五月九日識

金山題名



再游金山宿浴日樓在乙丑三月之十三日夕  
飧有酒飲未及一蕉葉醉矣臥不成寐起行山  
麓江清月白景色幽絕遂遵繚垣而一周焉夜  
深人靜萬籟俱寂惟聞魚龍潑刺波間而已回  
竚南廊按牆睇之蒼煙白霧鬱鬱在下絕不見  
水小時雲葉開解如奇石如亂獸參差磊砢布  
滿江面微風忽起浮氣盡收月愈瑩徹映射江  
水熠燿恍惚皆作玻璃琥珀色不自知其置身  
何所各院僧徒分日肅客一歲不能作十數更

五言  
番乃余庚申及今皆主此樓亦大異事也渠亭  
山人張貞

惠泉題名

劉伯芻論水之宜茶者七自一至五予皆得而  
酌之。澂泓甘冷。未有如惠山石泉者。迺強抑之。  
第二。不知何意。然世之妄庸巨子。謬秉衡鑑。既  
經品第。遂莫敢異議。亦與此同歎矣。康熙二十  
四年春三月望日。牟山張貞題。

虎丘題名



余三游姑蘇最後寓虎丘之月駕軒時與萊陽姜實節學在長洲汪琬茗文杭州朱溶若始德州李濤紫瀾游談其間千載之下必有以此爲故事者乙丑三月安丘張貞起元識男在辛書

雨花臺題名

辛未十月甲申日巳卓午出聚寶門涉長千里經木末亭登雨花臺回望石頭城鍾山屹立江水遙明天清氣爽目窮楚越顧而樂之再踰南岡訪老友張君瑤星於松風閣下計與相別未

二十年而瑤星掩抑摧藏已八十有四余亦蕉萃支離番然篤老回思往事恍若前身矣因書閣壁以誌慨歎園叟張貞題

燕子磯題名

自丁未至今二十五年中余五登此磯矣辛未十月二十六日從白門歸薄暮登舟拂曉過此攜兒在辛復造其巔時盛寒野日昏黃江濤起立欲於亭中少憩天風颺戾凜乎難留遂亟下焉北海張貞杞園記



細讀七題各寫景處奇麗翫苑如鮮花弱柳  
乳燕新鶯諷味之餘流連不已叙事處屹屹  
淪漣如蟠厓岫石風泉雲壑登臨之下感慨  
自生良由先生神情并山水相關故勝情靜  
趣觸緒紛來柳州而下斯爲罕儷

黃僊裳







